

Obavijest građanima o izvršnom postupku

**Znate li šta je izvršni postupak?
Znate li svoja prava i obaveze u izvršnom postupku?**

Niste platili račun za usluge koje ste koristili ili izvršili neke obaveze iz sudske, notarske ili odluke upravnog organa?

Neko traži od vas ili vi tražite od nekoga izvršenje obaveze ili isplatu duga?

Izvršni postupak pred sudom je pokrenut, sud je dozvolio izvršenje i vrijeme je za konkretne radnje koje sud provodi.

Znate li koja su vaša prava i obaveze u izvršnom postupku?



Znate li šta je izvršni postupak?



Imate potraživanje prema nekome, podnesite sudu prijedlog za izvršenje!



Sud će zaprimiti Vaš prijedlog, formirat će se sudski predmet i isti dostaviti sudiji kako bi nastavio postupanje i pomogao Vam da ostvarite svoje potraživanje.



Šta je zapravo izvršni postupak?

Izvršni postupak je sudski postupak kojim sud osigurava izvršenje sudske, ili notarske ili odluke upravnog organa, ili obaveza iz potpisane mjenice, ili neplaćenih računa za komunalne usluge koje prethodno nisu dobrovoljno izvršene kao i na osnovu platne liste.

Ukoliko vam neko duguje novac ili je dužan izvršiti neku drugu vrstu obaveze prema vama, **PUTEM SUDA MOŽETE TRAŽITI ISPUNJENJE.**

U ovom slučaju postajete **TRAŽILAC IZVRŠENJA.**

Ukoliko nekom dugujete novac, niste izmirili neka druga dugovanja, uključujući i račune za određene usluge, niste ispunili određene obaveze, **SUD, NA OSNOVU PRIJEDLOGA ZA IZVRŠENJE TRAŽIOCA IZVRŠENJA, ODREĐUJE PRINUDNO ISPUNJENJE.**

Tada vi postajete **IZVRŠENIK.**

Kako ćete pokrenuti izvršni postupak?

Ukoliko imate odluku suda, odluku notara ili odluku upravnog organa u kojoj piše da vam druga osoba duguje novac, a nije dobrovoljno izvršila obavezu, onda treba da podnesete sudu **prijedlog za izvršenje** protiv te osobe.

Kada podnesete prijedlog sudu dobijate ulogu **TRAŽIOCA IZVRŠENJA** i bitno je da od početka do kraja izvršnog postupka **aktivno sudjelujete**, odnosno postupate po zaključcima i rješenjima koje vam sud šalje, kako bi što prije namirili svoje potraživanje.

Imate potraživanje prema nekome?

Morate aktivno sudjelovati u sudskom postupku da bi ste što prije svoje potraživanje I naplatili!



Rješenje o izvršenju

Kako ćete znati da je protiv vas pokrenut izvršni postupak?

Ukoliko je neko protiv vas podnio sudu prijedlog za izvršenje, sud će Vam poslati Rješenje o izvršenju.

Prvo što trebate uraditi jeste **potpisati dostavnicu** da ste zaprimili Rješenje o izvršenju, međutim time što ste potpisali dostavnicu ne znači da se slažete sa onim što je navedeno u rješenju, to je samo dokaz sudiji da može nastaviti izvršavati svoj posao.

Ukoliko odbijete da potpišete dostavnicu, to će dostavljač/poštar

napisati na kovertu i vratiti sudu.

Sud će, u skladu sa zakonom, smatrati da ste dokument zaprimili, da ste upoznati sa sadržajem Rješenja o izvršenju i nastavice postupak.

U slučaju da niste kod kuće poštar/dostavljač će Vam ostaviti obavijest da u ostavljenom roku u pošti/sudu preuzmete pošiljku.

Ukoliko ne preuzmete pošiljku u roku sud će, u skladu sa zakonom, smatrati da ste dokument zaprimili, da ste upoznati sa sadržajem Rješenja o izvršenju i nastavice postupak.

U slučaju da ne živite na adresi koja je prijavljena u Vašem CIPS-u i dostava putem ove adrese ne bude uspješna, sud će objaviti Rješenje o izvršenju putem oglasne ploče suda i u dnevnim novinama.

Protekom 15 dana od dana objave, dostava će se smatrati urednom i sud će postupak nastaviti.

Šta nakon što saznate da ste dio postupka izvršenja?

Nakon što ste zaprimili rješenje trebate prvo provjeriti da li zaista dugujete ono što se od vas traži.

Možda vam je stigao zahtjev da platite dug koji ste ranije već platili. Možda ste ispunili



Provjerite da li ste zaista dužni ono što se od vas traži!

obavezu koja se traži u Rješenju o izvršenju.

Ukoliko pronađete dokaz, kao što je npr. uplatnica da ste platili dug, obavijestite o tome tražioca izvršenja i sud pismenim putem!

JA OVO NE DUGUJEM!!!

Ukoliko imate dokaz da ste uplatili traženo dugovanje prije podnošenja prijedloga za izvršenje,

REAGUJTE! KAKO? OVAKO!

KONTAKTIRAJTE TRAŽIOCA IZVRŠENJA

Ako se navedeno dugovanje odnosi na neplaćene račune za komunalne usluge, najbolje je da lično odete u poslovnicu.

IZJAVITE PRIGOVOR SUDU

Obavezno priložite dokaze iz kojih je vidljivo da je dugovanje plaćeno ili obaveza ispunjena.

Ukoliko imate dokaz da ste uplatili traženo dugovanje nakon podnošenja prijedloga za izvršenje postupak je isti.

Da bi se postupak obustavio potrebno je platiti sudsku taksu i zakonske kamate.

Kada zaprimite odluku suda, morate reagovati! U suprotnom, postupak se nastavlja i za vas nastaju dodatne obaveze....

JA OVO DUGUJEM!!!

Ukoliko ste ustanovili da ste propustili uplatiti neke račune, ispuniti svoju obavezu, imajte na umu da **dugovanja trebaju biti izmirena.**

Što prije ispunite svoju obavezu, manji će biti i ostali troškovi koji nastanu jer sud vodi postupak.

REAGUJTE! KAKO? OVAKO!

KONTAKTIRAJTE TRAŽIOCA IZVRŠENJA

Ako se navedeno dugovanje odnosi na neplaćene račune za komunalne usluge, najbolje je da lično odete u poslovnicu.

OBAVIJESTITE SUD

Ako ste naknadno uplatili dugovanje tražiocu izvršenja ili ispunili svoju obavezu.

IZJAVITE PRIGOVOR ZASTARE SUDU

Možete izjaviti prigovor zastare! Zastara ne znači da niste dužni, samo je prošao rok koji je zakonom određen da se traži ispunjenje obaveze. Ukoliko ispunite zastarjelu obavezu, nemate pravo zahtijevati vraćanje onoga što ste dali, čak i ako niste znali da je obaveza zastarjela.

Ne zaboravite da ste obavezni platiti i sudsku taksu.

Šta ako ništa ne uradite?

Ukoliko ništa ne poduzmete kada zaprimite rješenje o izvršenju, sud nastavlja postupak.

Postupak će se provesti do kraja, a vi ćete na kraju biti obavezni platiti dug, zakonske zatezne kamate, sudske takse kao i sve troškove koji su nastali tokom vođenja postupka.

Šta ako ne možete platiti?

REAGUJTE!!! KAKO???

OVAKO!

**KONTAKTIRAJTE TRAŽIOCA
IZVRŠENJA**

Kako biste se dogovorili oko načina ispunjenja. Ako dugujete

novac, Vaš dug možete platiti u nekoliko navrata, ukoliko se tako dogovorite sa vašim tražiocem.

**PODSJETITE TRAŽIOCA DA
OBAVIJESTI SUD** ako postignete dogovor o plaćanju na rate.

Bitno je da izvršenik reaguje odmah čim zaprimi odluku suda!

Na taj način skraćujete postupak, smanjujete svoje troškove

Šta sud radi ako dug nije izmiren?

Ako dugujete novac, sud u skladu sa prijedlogom za izvršenje ima nekoliko mogućnosti:

- može da zaplijeni vašu kuću, stan, vikendicu ili drugu nekretninu, istu proda,
- može da zaplijeni novac na računu koji imate u banci, zaplijeni dio penzije, plate
- može poslati sudskog izvršitelja na vašu adresu koji ima pravo da zaplijeni stvari u vašem domu ili vaš automobil, a sve navedeno kako bi se namirilo dugovanje.

Sve dok ne izmirite dug u cijelosti nećete moći primiti cjelokupni iznos vaših primanja.

Da biste izbjegli sve ovo, možete kontaktirati tražioca izvršenja i nagoditi se oko načina ispunjenja obaveze.



Kome mogu platiti dug?

Možete platiti:

1. **tražiocu izvršenja** lično ili na njegov bankovni račun,
2. iznos vašeg duga **možete predati i sudskom izvršitelju** ukoliko dođe da plijeni vašu imovinu.

Ako se dug plati sudskom izvršiocu isti je dužan da vam izda priznanicu da ste uplatili dug i da o tome obavijesti sudiju kako bi se postupak obustavio.

Ukoliko niste u cijelosti izmirili dug, postupak se ne može obustaviti sve dok se cjelokupni iznos ne isplati.

DUG UVIJEK MOŽETE PLATITI DOBROVOLJNO!!!

Kako ne biste postali dio izvršnog postupka jako je bitno da svoje obaveze izvršavate na vrijeme I da kontaktirate tražioca izvršenja odmah čim vam dođe opomena ili pismeno sa suda.

Na taj način skraćujete postupak I smanjujete svoje troškove



Visoko sudsko i tužilačko vijeće Bosne i Hercegovine
Visoko sudbeno i tužiteljsko vijeće Bosne i Hercegovine
Високи судски и тужилачки савјет Босне и Херцеговине
High Judicial and Prosecutorial Council of Bosnia and Herzegovina



Visoko sudsko i tužilačko vijeće BiH

Kraljice Jelene 88
71 000 Sarajevo
BiH

Centrala: +387 (0)33 707 500
Telefaks: +387 (0)33 707 550
E-mail: vstvbih@pravosudje.ba

Web:
<https://vstv.pravosudje.ba>
<https://vsts.pravosudje.ba>
<https://hjpc.pravosudje.ba>

ICEA III Projekat— Unaprjeđenje efikasnosti sudova I odgovornosti sudija I tužilaca u BiH—treća faza

Glavni cilj Projekta je unaprjeđenje efikasnosti, kvalitete, nezavisnosti i transparentnosti pravosuđa koje vodi ka kreiranju pravosudnog sistema u službi građana.

Aktivnosti predviđene projektom usmjerene su na održivost postignutih i ostvarivanje novih rezultata, s fokusom na unaprjeđenje efikasnosti pravosuđa u BiH, te osiguravanja jednakog pristupa pravdi i jednakost svih građana pred zakonom.

Jedna od aktivnosti Projekta je **I Unaprjeđenje izvršnog postupka u pravosudnim sistemima u BiH**

Ovaj segment projekta odnosi se na unaprjeđenje radnih procesa izvršnih odjeljenja pilot sudova, koji se realizuje u saradnji sa Agencijom za izvršenje Švedske—SEA.

Efikasno pravosuđe u službi građana!

